

Kondoo wa Malisho Yake

Bwana ndiye mchungaji wangu, Sitapungukiwa na kitu. Katika malisho ya majani mabichi hunilaza, Kando ya maji ya utulivu huniongoza.—Zaburi 23:1, 2.

Yesu, Mwalimu mkuu, anapowasilisha masomo Yake ya kujifunza kutoka katika kitabu kilichowazi cha asili, Anafungua jicho la uelewa wao ili kuonesha umakini ambao umetolewa kwenye vielelezo kwa kupatana na nafasi vilivyonavyo katika ulinganifu wa uumbaji. Ikiwa majani ya kondeni, ambayo leo ni mazuri sana, yakiipendeza akili, [na] kesho kukatwa na kuchomwa moto, yanajaliwa sana na Mungu, ni jinsi gani basi atamjali mwanadamu aliyumbwa kwa mfano Wake. Hatuwezi kukuza mawazo yaliyotiwa chumvi juu ya thamani ya nafsi ya mwanadamu, na uangalifu ambao umetolewa na Mbingu kwa mwanadamu. Na sasa anatoa ahadi yenye faraja, “Msiogope, enyi kundi dogo; kwa kuwa Baba yenu ameona vema kuwapa ule ufalme.”

Bwana Yesu ndiye Mchungaji mwema. Wafuasi Wake ni kondoo wa malisho Yake. Mchungaji daima anakuwa na mifugo yake na kuwalinda, na kuwatunza mbali na mbwa mwitu, kuwatafuta kondoo waliopotea na kuwabeba ili kuwarudisha zizini, ili kuwaongoza katika malisho ya majani mabichi na kando ya maji ya uzima.

Siwezi kupuuza wokovu mkubwa ambao umeletwa kwangu kwa gharama kubwa mno kwa Baba yangu wa mbinguni, ambaye “aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.” Sitamvunja heshima Mkombozi wangu kwa kuyadharau mateso Yake, majaribu Yake, kujishusha Kwake, kafara Yake, kifo Chake, kwa sababu anatupenda sana, Alikubali Mwenyewe kuwa mbeba dhambi wetu. Oh, upendo wa ajabu, upendo usioelezeka jinsi gani! Alikuwa mtu wa huzuni nyingi, ajuaye sikitiko. Alikufa msalabani [kana kwamba alikuwa] mkosaji, ili kwamba mwanadamu ahesabiwe haki kwa ustahilifu Wake....

Ni kupitia kwa Mpaji wa Uzima kwamba nafsi inaweza kuishi milele zote, na anapaswa kuitunza kwa uangalifu mkubwa nafsi ambayo Yesu aliinunua kwa damu Yake mwenyewe. Kristo ni mwenye Uweza. Aweza kukilinda kile nilichokiweka amana Kwake hata siku ile. Ikiwa thamani ya nafsi haijathaminiwa, ikiwa nyua zake za hekalu zimetiwa unajisi na wanunuzi na wauzaji, na kwa kuikabidhi katika utawala na ukaaji wa Shetani katika mawazo au hisia, ningewasihi kwa dhati kabisa kwamba msicheleweshe, nani njooni mbele za Mungu kwa maombi ya dhati bila kubahatisha hata dakika moja au kusitasita, na kusema, “Ee Bwana, nimefungua mlango wa moyo wangu kwa adui Yako mbaya sana na adui mbaya mno kwa nafsi yangu. Nimetenda kana kwamba ningeweza kuiokoa nafsi yangu mwenyewe, kana kwamba ninaweza kutenda dhambi na kisha kubadilika pale ninapochagua kufanya hivyo; lakini nimeiona mamlaka inayonishikilia katika milki yake. Ni Wewe pekee uwezaye kuniokoa ili kwamba nafsi yangu isiangamizwe milele.... Kamwe sitaendelea kuizuia mbali Nawe. Sithubutu kamwe kuiweka amana kwenye mamlaka nyingine bali Kwako.... Ninaiweka miguuni Pako. Ewe Mwana-Kondoo wa Mungu, ioshe nafsi yangu katika damu ya Mwana-Kondoo; ivishe kwa vazi Lako la usafi na haki” (Manuscript 73, 1893).